

ԱՆԻ ՆՇԱՆԻ ՀԱՆԵՅԱԼ

(1941-2019)

Երկարատև, ծանր հիվանդությունից հետո վախճանվեց ճանաչված բարբառագետ, բանասիրական գիտությունների թեկնածու Անի (Անահիտ) Նշանի Հանեյանը:

Ա. Հանեյանը ծնվել է 1941 թ. մարտի 3-ին, Երուսաղեմում՝ Մեծ Եղեռնից փրկված և Պաղեստինում հաստատված քեսաբցիների ընտանիքում: 1947 թ. նրանց ընտանիքը հայրենադարձվել է և հաստատվել Երևանում, որտեղ ավարտել է միջնակարգը և Երևանի պետական համալսարանի բանասիրական ֆակուլտետը:

Ա. Հանեյանի մասնագիտական ողջ գործունեությունը կապված է եղել ՀՀ ԳԱԱ Հ. Աճառյանի անվան լեզվի ինստիտուտի հետ, որտեղ ավարտել է ասպիրանտուրան, պաշտպանել ատենախոսություն և ստացել բանասիրական գիտությունների թեկնածուի գիտական աստիճան, երկար տարիներ աշխատել որպես բարբառագիտության բաժնի գիտաշխատող, ավագ գիտաշխատող և բարբառների ուսումնասիրության թեմատիկ խմբի ղեկավար:

Նա հեղինակ է հայերենի բարբառների հնչյունաբանության, բարբառագիտության, ձևաբանության հարցերին նվիրված բազմաթիվ գիտական աշխատանքների, Տիգրանակերտի բարբառին նվիրված մենագրության («Տիգրանակերտի բարբառը», Ե., Հայկ.ՍՍՀ ԳԱ հրատ., 1978, 231 էջ): Ա. Հանեյանը մեծ ներդրում ունի հայերենի բարբառների բաղաձայնական համակարգի ուսումնասիրության մեջ: Իր գործուն մասնակցությունն է ունեցել «Հայերենի բարբառագիտական ատլասի նյութերի» հավաքման ծրագրի ստեղծման աշխատանքներին:

Ա. Հանեյանը իր հայրենիքին, նրա մշակութային արժեքներին հոգու ամենամոլորական թելերով կապված մտավորական էր, որի վկայությունն է, մասնավորապես, լեզվի ինստիտուտում հիմնված, հետագայում լայն ճանաչում գտած «Ակունք» ազգագրական համույթին նրա մասնակցությունը:

Վաստակաշատ գիտնականի և ազնիվ մտավորականի հիշատակը միշտ վառ կմնա նրան ճանաչողների, գործընկերների սրտերում: